



Իրավունքի զարգացման և պաշտպանության հիմնադրամ

Հասցե՝ 0010, ք. Երևան, Վարդանանց փակուղի 8, տարածք 3

Հեռ.՝ +374 93 515 600

Էլ. հասցե՝ ldpf.foundation@gmail.com Կայք՝ www.ldpf.am

Կարծիք

«Բաց կառավարման գործընկերություն» նախաձեռնության շրջանակներում Հայաստանի Հանրապետության 2022-2024 թվականների գործողությունների ծրագիրը հաստատելու մասին» ՀՀ կառավարության 2022 թվականի հոկտեմբերի 6-ի N 1568-Լ որոշման մեջ փոփոխություններ կատարելու մասին որոշման նախագծի վերաբերյալ

31.08.2023 թ.-ին Իրավական ակտերի նախագծերի հրապարակման միասնական կայքում քննարկման է ներկայացվել «Բաց կառավարման գործընկերություն» նախաձեռնության շրջանակներում Հայաստանի Հանրապետության 2022-2024 թվականների գործողությունների ծրագիրը հաստատելու մասին» ՀՀ կառավարության 2022 թվականի հոկտեմբերի 6-ի N 1568-Լ որոշման մեջ փոփոխություններ կատարելու մասին նախագիծը (այսուհետ՝ նաև՝ Նախագիծ):

Ընդունելով Նախագծում տեղ գտած փոփոխված ռազմավարության գործողությունների ծրագրում տեղ գրած գործողությունների կարևորությունը՝ անհրաժեշտ ենք համարում որոշ հանձնառությունների մասով կատարել հստակեցումներ/լրացումներ՝ դրանց շրջանակում կարևոր բաղադրիչներ ընդգրկելու և հետագայում տարրնթերցումներից խուսափելու նպատակով: Այսպես.

1. Առաջարկվում է գործողությունների ծրագրի «ԲԱՑ ԵՎ ԹԱՓԱՆՅԻԿ ԱՐԴԱՐԱԴԱՏՈՒԹՅՈՒՆ» բաժնի «Հանձնառության հակիրճ նկարագիրը» տողում, «ինչպես նաև բոլոր դատական գործերի» բառերից հետո լրացնել «այդ թվում՝ դատական երաշխիքների վարույթների» բառերը: Այս լրացում-հստակեցումն անհրաժեշտ է, որպեսզի դատական համակարգի հաշվետվողականության և թափանցիկության ապահովման, համապարփակ վիճակագրության վարման պահանջն ապահովվի ոչ միայն գործերի ըստ էության քննության վարույթներով, այլ նաև պակաս կարևորություն չունեցող մյուս վարույթների մասով, այնինչ Նախագծի

գործող խմբագրության մեջ առկա շարադրանքը կարող է որոշակի տարբերություններ ցուցնել՝ վերը նշված վարույթները «բոլոր դատական գործերի» արտահայտության մեջ ներառված լինելու/չլինելու մասով:

2. Միննույն ժամանակ առաջարկվում է գործողությունների ծրագրի «ԲԱՅ ԵՎ ԹԱՓԱՆՑԻԿ ԱՐԴԱՐԱԴԱՏՈՒԹՅՈՒՆ» բաժնի «Հանձնառության հակիրճ նկարագիրը» տողի «ա)» ենթակետում «գործերի տեսակներ, դատավորներ, ժամկետներ» բառերից հետո լրացնել «այդ թվում՝ ըստ գործերի քննության ողջ տևողության» բառերը: Սույն լրացման անհրաժեշտությունը պայմանավորված է նրանով, որ գործողությունների ծրագրում մի կողմից նշված է, որ, գործող իրավակարգավորումների համաձայն, հաշվետու ժամանակահատվածում ավարտված գործերի քննության միջին տևողության որոշման ցուցիչները երկուսն են, այն է՝ նիստերի քանակ և ժամանակ (հաշվարկի միավոր՝ ժամ), այնուամենայնիվ, չի ուրվագծվում այս վիճակագրական ցուցիչների կատարելագործման միջոցը: Հարկ ենք համարում ընդգծել, որ գործող երկու ցուցիչները հնարավորություն չեն տալիս ստանալու գործերի քննության տևողության վերաբերյալ իրական և առավել արդիական տեղեկատվություն և բավարար չեն գործերի քննության տևողության ողջամտությունը գնահատելու համար, ավելին, նշված վիճակագրական տվյալի հավաքման անհրաժեշտությունը բխում է նաև միջազգային չափորոշիչներից, մասնավորապես Եվրոպայի խորհրդի Արդարադատության արդյունավետության եվրոպական հանձնաժողովի (CEPEJ) հաստատած դատական վիճակագրության վերաբերյալ ուղենիշներից:

Իրավունքի զարգացման և պաշտպանության հիմնադրամ